

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

In cuasi cincuenta agns di ativitât al à dât un grant contribût par valorizâ la cultura e la storia sociâl, economica e religjosa dal Gurizan e da la Bassa furlana

A Ferruccio Tassin il premi Epifania

Sono personis in di di vuê a disposizion par dâ una man e che no si tirin indaûr par colaborâ?

Roba rara, soradut tal ambient culturâl.

Tal Gurizan e ta Bassa una di chistis personis al è dal sigûr Ferruccio Tassin: nol è un lûc tal Friûl di soreli jevât (e no dome) li che il professôr Tassin nol vedi tignût una conferenza, scrit un articul o un libri, o presentât un volum, simpri cul so stîl cetant vivarôs che i ven di una salda formazion no dome storica ma anca e soledut pedagogjica e didatica. Cuant che a cualchidun i dan un premi, il coment plui semplic, sclet e furlan al è: "dut meritât!". Cussì a Ferruccio Tassin, ai 4 di Zenâr cu ven ta sala Margherita di Tarcint, al sarà consegnât un premi di gala, il premi Epifania.

Promovût da la Pro loco di Tarcint pa prima volta tal 1956, chist premi al è un ricognossiment par personis o istituzions che che cu la lôr opera a àn onorât il Friûl, par vê fat alc di impuartant tal cjamp da la solidarjetât umana, o che par fâ il lôr dovê a àn dovût lavorâ in condizions dificilis, o che si son spindudis in cjamp sociâl, professionâl, educatîf, culturâl, da la assistenza e beneficenza. Tra i premiâts dal Gurizan dilunc dai agns o ricuardin in particolâr Cecilia Seghizzi



Conseîr da la Societât Filologica Furlana, deputât da la Deputazion di Storia Patria pal Friûl, al fâs part anca dal diretîf dal Istitut di Storia Sociâl e Religjosa di Guriza

(1964), Giuseppe Zigaina (1963), Francesco Capello (1966), Ferruccio Bernardis (1967), Giovan Battista Falzari (1969), Franco De Gironcoli (1973), Biagio Marin (1975), Ervino Pocar (1977), Camillo Medeot (1979), Sergio Tavano (1980), Enzo Bearzot (1983), Carlo Rubbia (1984), Eraldo Sgubin (1985), Celso Macor (1988), Silvano Piani (1990), Luciano Spanghero (1992), Ludovico Bressan (1993), Giuseppe Baldas (2006), Ivana Cossar (2012), Bruno Pizzul (2014), Coro Polifonico di Ruda (2016) e Paolo Petiziol (2022).

Ferruccio Tassin al è nassût a Visc ai 29 di Juugn dal 1944. Dopo dai studis a Guriza, si è laureât in materiis letterariis a l'Universitât di Bologna, cuntuna tesi su la storia da cultura furlana, in particolâr su la figura e la opera di Francesco Bernardo Maria de Rubeis (1687-1775). Al è stât docent di letaris e

storia, autôr e curadôr di cetancj volums di interes storic; al colabora cun giornai e rivistis regjonâls e cun istituzions austriachis e slovenis. Al è stât organizadôr e reladôr in cetantis cunvignis storichis nazionâls e internazionâls.

Al à fat cetantis conferenzis su la storia sociâl e religjosa ta nestra region, in Venit e in Slovenia e al à colaborât anca cun "Concordia et Pax" pe ricostituzion dai rapuarts di amicizia tra talians, furlans e slovens.

Al quarta indevant in di di vuê la bataia pa tutela dal cjamp di concentrament fassist di Visc. Conseîr da la Societât Filologica Furlana, deputât da la Deputazion di Storia Patria pal Friûl, al fâs part anca dal diretîf dal Istitut "Gasparini" di Gardiscja. Al à fat part da la Comission di art sacra da l'Arcidiocesi di Guriza e dal Istitut di Storia Sociâl e Religjosa di Guriza (di chist istitût al è stât anca president). In cuasi cincuenta agns di ativitât al à dât un grant contribût par valorizâ la cultura e la storia sociâl, economica e religjosa dal Gurizan e da la Bassa furlana cun publicazions, articui, relazions e conferencis. Par chist il "Premi Epifania" a Ferruccio Tassin al è... dut meritât!

Feliciano Medeot

Un progjet di studi e valorizazion dai artiscj dal Rinassiment tra Friûl venit e arciducâl

Carlo da Carona e i scultôrs lombarts



COROT PAL CRIST MUART (GLESIE DI S. LAURINÇ, FLUMISEL)

La Societât Filologjiche Furlane e à inviât che nol è tant un progjet di studi e valorizazion dai scultôrs lombarts dal Rinassiment tra Friûl venit e arciducâl e in particolâr da la opere di Carlo da Carona.

Il progjet, finanziât da la Regjon Autonome Friûl Vignesie Julie, al è in colaborazion cu lis Arcidiocesis di Guriza e di Udin e cu la Diocesi di Pordenon.

A son in program cetantis ativitâts, tacant cuntune campagne di studi e documentazion fotografiche in diversis localitâts dal Friûl par catalogâ lis oparis dai scultôrs lombarts atîfs te nestre region in ete rinassimentâl. Cheste catalogazion e vignarà racuelte intune vuide a lis oparis di Carlo da Carona, par cure di Giuseppe Bergamini, Vieri Dei Rossi e Isabella Reale, insiorât cun fotografiis fatis di pueste.

I prins risultâts de indagjin a saran presentâts intune zornade di studi che si fasarà ai 31 di Març dal 2023 a S. Denêl. A la cunvigne a cjaparan part cetancj esperts dal setôr, cun chê di confrontâsi a nivel multidissiplinâr su la opere dal scultôr a la lûs dai ultins materiâi e documents che a son stâts cjatâts, inte suaze di une lungje stagjon di artiscj lombarts atîfs in Friûl bielzà de ete patriarcjâl.

I contribûts da la cunvigne a saran ancje racuelts intun volum di ats. Cun di plui si fasarà une mostre fotografiche itinerant, che e presenterà la produzion di Carlo da Carona e di chei altris scultôrs, compagnade di itineraris vuiddâts a la scuvierde des lôr oparis in Friûl.

Sul teritori dal Gurizan a son diversis di chestis oparis, par esempi tal domo di S. Adalbert di Cormons, te basiliche di Aquilee, te glesie di S. Laurinç di Flumisel e in chê di S. Stieffin di Salcan.

Ai letôrs

Ai letôrs di Friûl di Jevât e di Voce Isontina, us augurìn di cûr bon Nadâl e bon principi dal 2023: che l'An gnûf al puarti a ducj salût, pâs e ogni ben.

La Societât Filologjiche Furlane